



**SOS So! Ha! Hah! Chefin furt!**

Melodie: Bee Gees; Stayin' alive

Wär lang do schafft, goht druuf. Egal! Schliesslech schafft do keine lang.  
D Frog isch: Flüchtisch sälber, oder packt dr Chef di und seit: «Gang!»

Chefin furt. Chefarzt furt. Wär schloft und schwiget? Dr Fluri Kurt.  
D Schaffner meint, s gieng si nüt a. Wenn lüpft s ächt dr Hüüserma?


Dr Fuehrigsstil isch kolonial. Im Bürgerspital. Im Bürgerspital!  
Dr Tschutt dä git me dir anal. Im Bürgerspital. Dasch dört normal.  
Hah! Hah! Hah! Hah! Bürgerspital! Bürgerspital!  
Hah! Hah! Hah! Hah! Bürgerspitaahah Ahah aahh aahh aah!

Bettelhüüser brucht s nid zwöi. Schad, dass si s falsche abgrisse hei!  
Macht di nid dr Job zur Sau, so schafft das sicher d «Kunscht am Bau»!

Schwöschter furt. Pfleger furt. Wär schloft und schwiget? Dr Fluri Kurt.  
Au d Putzfrau isch nümme füre cho. Gli schaffe nume mir no do!

S Arbetsklima isch brachial: Im Bürgerspital. Im Bürgerspital!  
Morn git s scho dr nöchsch Skandal. Im Bürgerspital. Dasch dört normal.  
So! Ha! Hah! Hah! Bürgerspital! Bürgerspital!  
So! Ha! Hah! Hah! Bürgerspitaahah Ahah aahh aahh aah!

**WÜRGERSPITAL!**



**SOS Elisabeth**

Melodie: Ronald Binge, Elisabethserenade

Kompliment Elisabeth! ... (Glockenspiel)  
Machs Karriere im Schlof. D Frau Herzog findt's doof,  
Doch s liebt jede Goof s sympathische Schof!  
Elisabeth.

Du hesch s gschafft, Elisabeth! Wär hätt s dänkt Elisabeth!  
Jetz bringsch Du Harmonie is Bundesrots-Vieh,  
Souplesse und Benäh. Me seit nur no: «MÄÄÄÄH!»  
Elisabeth.

Chumm Alain, säg «MÄÄÄÄH!»



**SOS Obeverchauft**

Melodie: Ennio Morricone; Spiel mir das Lied vom Tod



Stilli —  
Lislig süslet dr Wind zum Bieltor ii —  
E chlini wiissi Tuube pickt es Brösmeli ab  
de lääre Tische vo dr Suteria —  
Es Haselmüüslü daselet über d Büecheruslag  
vorem Lütthy —  
Es einsams Pudeli streunt vor em Manor düre  
und brunzt a ne Ghüderchübel —  
Im Hofer gammle drü Nidlechüechli fridlech  
vor sich häre —  
Voller Rueh rusche d Spitzahörn uf em  
Fridhofplatz —

**S ISCH OBEVERCHAUF!**

**SOS Das Zelt**

Melodie: Kinderlied; Itsy bitsy spider




Ir Weststadt stohet es Zält, dört wird dr Stadtmischt drin behandelt.  
Dank däm wird s Landschaftsbild trotz Mischd und Ghüder nid verschandelt.  
Das Zält isch guet, doch leider z chli. Eso isch das für d Chatz:  
Chli weschtwärts und chli breiter – de hätt Gränche drunder Platz!!

**SOS Influencer**

Melodie: Kinderlied; Itsy bitsy spider

Corona schreckt üs nümme –  
Impfdose gammle vor sich hi.  
Jetz lauft scho d Vorbereitig uf  
die nöchschti Pandemie.  
Weles Virus kippt üs äch de nöchschti  
Johr us de Socke?  
Isch s äch Influenza oder ehnder Affepocke?  
D WHO wott konsequant Asteckige verhüete  
Und tuet drum schints jetz Influencer  
präventiv verbiete.



**SOS Whistleblowing**

Melodie: Kinderlied; Itsy bitsy spider


Dr Charles schloof mit sim Teddybär,  
d Camilla oben ohne,  
Är schlegli mit sim Brüetsch und meh  
so gheimi Sensatione,  
Mit däm verdient dr Harry hundertfüzig Millione.  
Dir gseht: So Gheimnis z biichte, cha sich  
gopfridschtutz scho lohne!  
D Wohret brichte wär doch lukrativ und  
gar nid schwär!  
So wär dr Alain Berset  
gli mol Milliardär.





## SOS La vie en rose

Melodie: Edith Piaf; La vie en rose



Nei, chöit dänke liebi Lüt  
I weiss ganz sicher nüt.  
Nid mol under Hypnose!  
Wenn mi Pressechef zvil schnurrt,  
Wird är entsorgt, Schwupp! Furt!  
Wie abgloffni Impfdose.  
S ganze Volk macht, was i wott.  
I bruuch ke «BLICK», weiss Gott,  
Das wär zum Quatsch no d Soosse!  
Me liebt mi, verehrt mi, me het mi so gärn.  
I bi au Di Stärn! Und wenn nid, chasch mer bloose!

LA LALALALALA. LA LALA C'EST ÇA, LA VIE EN ROSE!!

## SOS Go Susi Go!

Melodie: VolXRox; Go Odi go!

Immer hert am Limit wenn me diskutiert.  
Immer ideologisch ufmunitiert.  
Dini arme Gspänli si jo gäng fruschtriert,  
Will, wär nid pariert wird vo dir flettiert.

Stohsch im Rothus parat. D Zwärgli näb Dir im Griff.  
Du bisch Kapitän und dr Kanton Dis Schiff!

Go go go go, Susi go! Susi, Susi go!  
Geisse-stuur fahrsch allne über s Muu.  
Go, go, go, Susi go! Susi, Susi go!  
Du seisch wo düre! Rächt hesch nume Du!

Jedi Kritik und jedi Logik gö a Dir verbii.  
Ke Widerspruch! Wo chiem me do au hii!

Go go go go, Susi go! Susi, Susi go!  
Geisse-stuur fahrsch allne über s Muu.  
Go, go, go, Susi go! Susi, Susi go!  
Du seisch wo düre! Rächt hesch nume Du!

SUSI, SUSI, SUSI: GO!!



## SOS Mein Name ist Hase

Melodie: Chris Roberts; Mein Name ist Hase

I üsem Spital het d Frau Chef müesse go.  
Das heisst, me weiss nid, isch si eigentlech no do.  
Mir wüsste so gärn, öb me si het entloh.  
Doch Wurscht was passiert: S wird nüt informiert!  
Will s Departemänt heig ke Ahnig dervo:

Mein Name ist Susanne und ich weiss von nichts.  
Isch öppis passiert? I bi nid informiert!  
Bi die falschi Adrässe! Ha alles vergässe!  
Mein Name ist Hase. So wird do regiert!

Dr **BLICK** isch am schnällsichte, är druckt Covid-News.  
Was d Bundesröt bschliesse, gäng zwee Tag vorus.  
Är hilft drum em Berset, die Schwizer z erzieh.  
Das darf dä doch nie!! – Jetz isch s halt eso.  
Doch dr Alain het ganz sicher nüt gwüst dervo!

Mein Name ist Berset und isch weiss von nischts.  
'at jemand geplaudert? Mon Dieu, non! Misch schaudert!  
Der Lauener ist Schuld! Jetzt 'aben Sie Geduld!  
Mein Name ist 'ase und Schweigen ist Gould!

S FBI het hochgheimi Akte entdeckt.  
Und stellet nech vor: Wo hei die nume gsteckt?  
Nid im Wiisse Hus. Nei, im Chef sir Garasch!  
Das isch e Blamasch! Wär het die dört gloh?  
I wette dr Biden weiss gar nüt dervo!

Mein Name ist... Äh... («Biden!»)... oh yes, that's my name!  
Frog nid wo n i wohne! I glaube, deheim.  
Ha d Socke im Chüelschrank, und s Pijama im Klo,  
I ha gar kei Garasch. Weiss ömu nümme wo!



## SOS Bauamt


Melodie: Mani Matter; Alpeflug

Ufem Bauamt chlöpfe d Korke,  
S Zwöiezwänzgi het rentiert.

Denn dr Poschtplatz isch jetz suber.  
Alli Böim si abrasiert.

Amthausplatz, Dornacherplatz, –  
Jetze luege mir's als klar a

Wohi s Bauamt mit dr Stadt wott:  
Ihres Leitbild isch d Sahara.



swisscom

MAIN SPONSOR

~~Irgendwann~~  
Jetzt klimaneutral.

